

## Headlines

1. प्रधानमंत्री नरेंद्र मोदी होरें स्वच्छता ही सेवा अभियान च सक्रिय तौर पर हिस्सेदारी करने आस्तै मुख दे लोकें दा आह्वान कीता ऐ।
2. मुखमंत्री उमर अब्दुल्ला होरें श्रीनगर च कैबिनेट दी बैठक दी अध्यक्षता कीती, शासन ते विकास सरबन्धी महत्वपूर्ण फैसलें गी मंजूरी दिती।
3. उपमुखमंत्री सुरिंद्र कुमार चौधरी होरें श्रीनगर च बुलवार्ड रोड पर शिड़क गी चैड़ा करने दे कम्मै दा जायजा लैता।
4. दुनिया दी सब्बने शा बड्डी सरकारी माली मदाद आहली सेहत बीमा योजना आयुषमान भारत अज्ज अपनी 7मीं बरेगण्ड मना'रदी ऐ।
5. जम्मू च महाराजा हरि सिंह हुंदी 130मीं जयंती धूमधाम कन्नै मनाई गई, रैलियां ते सांस्कृतिक कार्यक्रमें दा आयोजन कीता गेआ।



## PM-Swacchata

प्रधानमंत्री नरेंद्र मोदी होरें स्वच्छता ही सेवा अभियान च सक्रिय तौर पर हिस्सेदारी करने आस्तै मुख दे लोकें दा आह्वान कीता ऐ। सोशल मीडिया दी इक पोस्ट च मोदी होरें इसी इक प्रेरणादायक पैहलकदमी दस्सेआ। एहू पैहल सब्बन दी जिम्मेदारी ते राश्ट्री मान दी भावना गी दर्शादी ऐ। उनें स्वच्छता उत्सव कन्नै लोकें गी जुड़ने ते 25 सितंबर बडुलै 8 बजे श्रम दान करने दा आग्रह कीता। 25 सितंबर गी पंडित दीन दयाल उपाध्याय हुंदी जयंती बी ऐ।



## CM-Cabinet Meet

मुखमंत्री उमर अब्दुल्ला होरें अज्ज श्रीनगर दे सिविल सचिवालय च कैबिनेट मीटिंग दी अध्यक्षता कीती। बैठक दरान शासन ते विकास कन्नै जुड़े दे कई महत्वपूर्ण फैसले लैते गे। अधिकारिणं दस्सेआ जे इस दरान मुख प्रशासनिक मामलें पर चर्चा कीती गई जेदा मकसद पूरे-

पराते शासन च सुधार आहनना ऐ। मुखमंत्री होरें इनें फैसलें गी समेंसिर लागू करने पर जोर दित्ता तां जे इंदा लोकें तगर फायदा पुज्जै। इस बैठक च वरिष्ठ मंत्रियें ते आला अधिकारिणं हिस्सा लैता। बैठका च लैते गेदे फैसलें दे होर ब्यौरे दी प्रतीक्षा ऐ।

<><><><><><>

### Dy. CM Srinagar

उपमुखमंत्री सुरेंद्र चौधरी होरें श्रीनगर दे नेहरू पार्क कश Boulevard शिड़क गी चैड़ा करने आहले कम्मै दा जायजा लैता। इस मौके पर मुखमंत्री हुंदे सलाहकार नासिर असलम वाणी होर बी उन्दे कन्नै मौजूद हे। उनें कम्मै दी प्रगति दा जायजा लैता ते कम्म पर मौजूद अधिकारिणं कन्नै बी गल्ल कीती। उपमुखमंत्री होरें कम्मै गी समेंसिर पूरा करने पर जोर पाया। उनें जोर देइऐ आखेआ जे इस शिड़क दे मुकम्मल होई जाने कन्नै शिड़क राबता बेहतर होग ते मुकामी लोकें ते इलाके च औने आहले सैलानिणं गी बी सहूलत होग।

<><><><><><>

### Seva Parv

मुख भरै च चलाए गेदे सेवा पर्व समारोहें दे इक हिस्से दे तौर पर अस अज्ज दस्सगे जे किस चाल्ली मोदी सरकार नै प्रधानमंत्री कौशल विकास योजना दे राणं भारत दे नौजोआनें गी सशक्त बनाया ऐ। 11 ब'रे पैहले प्रधानमंत्री नरेंद्र मोदी होरें भारत दे नौजोआनें गी सशक्त बनाने दा सुखना दिक्खेआ हा, जिस करी 15 जुलाई 2015 गी प्रधानमंत्री कौशल विकास योजना दी शुरूआत कीती गई ही। मौजूदा समें च अपने चौथे गेड़ च इस कार्यक्रम च इस ब'रे जुलाई म्हीने तगर तकरीबन 1 करोड़ 63 लक्ख नौजोआनें गी सिखलाई दित्ती गई ऐ जिंदे च 45 फीसदी महिलां न। एहू पैहलकदमी नौजोआनें गी अपना भविक्ख बनाने ते अपना कारोबार शुरू करने च मदद करा'रदी ऐ।

<><><><><><>

## Prog. Announcement

आकाशवाणी दा क्षेत्रीय समाचार एकांश जम्मू “सेवा पर्व 2025” दे सिलसिले च आत्मनिर्भर भारत विषय पर 30एं मिन्टे दी इक विशेष परिचर्चा प्रसारित करने जा रदा ऐ। कल बुधवारें 24 सितम्बर गी प्रसारत होने आहली इस परिचर्चा च स्हाड़े परौहने होगन उद्योग ते बपार मैहकमे दे निदेशक अरुण मन्हास जेहड़े इस विषय पर तफसीली जानकारी देने दे कन्नो-कन्नो एहदे बक्ख-बक्ख पैहलुएं पर चर्चा बी करगन। इंदे कन्नै गल्लबात करगन स्हाड़ियां न्यूज एंकर श्रुति खजूरिया ते अभिलाषा शर्मा। चेता रक्खयो कल, बुधवारें 24 सितम्बर दिने साड्डे 12 बजे, स्हाड़े इसै चैनल पर मीडियम वेव 303 मीटर यानी 990 किलोहर्टस ते एफ.एम. 100 इशारिया 3 मैगाहर्टस पर।

<><><><><><>

## Ayushman-Bharat

आयुष्मान भारत प्रधानमंत्री जन आरोग्य योजना दे अज्ज 7 बजे पूरे होआ करदे ना। सितंबर 2018 च रांची थवां शुरू कीती गेदी दुनिया दी सब्बनें थमां बड्डी सेहत सरबंधी सरकारी वित्त पोषित सेहत बीमा योजना ऐ। इस योजना राएं मुल्लखै च सेहत सरबंधी सेवा च क्रांतिकारी बदलाव आया ऐ। एहदे कन्नै 55 करोड़ थमां मते लोकें गी लाहू पुज्जा ऐ। इस स्कीम तैहत हर परौआर गी 5 लक्ख रपे दा सालाना सेहत बीमा उपलब्ध करोआया जा'रदा ऐ जेदे राएं मुल्लख भरै च कैशलेस ते कागज रैहत इलाज मुमकन होआ ऐ। इस योजना तैहत अजें तगर 10 करोड़ 30 लक्ख थमां मते लोकें अस्पतालें च पंजीकरण करोआया ऐ ते 1.47 लक्ख करोड़ रपे शा मते दे कैलशेस ईलाज कन्नै मरीजें दी बचत करोआई।

<><><><><><>

## Maharaja Hari Singh

अज्ज महाराजा हरि सिंह हुंदी 130मीं जयंती ऐ। ओहू उस्सले दी रियासत जम्मू-कश्मीर दे खीरी राजा हे। उन्दी जयंती दे सरबंधै च कई सारे श्रद्धांजलि कार्यक्रमें दा सरिस्ता कीता गेआ। कई सारियां रैलियां कड्डियां गेइयां। हरि सिंह होरें गी शिक्षा, समाजी न्याऽ ते उन्दे शासनकाल लेई म्हेशा चेता कीता जंदा ऐ।

महाराज हरि सिंह हुंदी जयंती पर उपराज्यपाल मनोज सिन्हा, उपमुख्यमंत्री सुरेंद्र चौधरी ते ट्रांसपोर्ट मंत्री सतीश शर्मा होरें बी उनेंगी श्रद्धांजलि भेंट कीती। केंद्री मंत्री नितिन गडकरी ते केंद्री राज्यमंत्री डॉ. जितेंद्र सिंह होरें बी महाराजा होरें गी उन्दी जयंती पर श्रद्धांजलि भेंट कीती।

<><><><><><>

### Ramban-Agri

राई-बाई मैहकमा रामबन नै मिट्टी दे नरोएपन सरबंधी प्रबंधन पर इक्क दिनी सिखलाई कार्जक्रम दा कामयाबी कन्नै सरिस्ता कीता। कार्जक्रम च मैहकमे दे अफसरें करसानें कन्नै गल्लकत्थ कीती।

<><><><><><>

### Swasth Nari

स्वस्थ नारी सशक्त परिवार अभियान दे तैहत उधमपुर जिले दे चनैनी च सामुदायिक सेहत केंद्र च मुफ्त सेहत जांच कैंप दा सरिस्ता कीता गेआ। इस कैंप च बड़ी मती गिनतरी च महिलां शामिल होइयां, खासतौरा पर दूर-दरेडे ते ओहू इलाके जित्थे इनें सेवाएं दी उपलब्धता घट्ट ऐ। जांच ते सलाह कन्नै व्यापक मेडिकल सेवां इस कैंप च मुफ्त उपलब्ध करोआइयां गेइयां। इस कैंप दा उद्घाटन विधायक बलवंत सिंह मनकोटिया होरें कीता ते उनें बुनियादी सेहत सरबंधी जरूरतें गी पूरा करने लेई इस पैहलकदमी दी सराहना कीती।

<><><><><><>

### GST-Reforms

अगली पीढ़ी दे वस्तु ते सेवा कर GST लागू होई गेन। कपड़ा उद्योग गी राहत देने आस्तै सरकारै उद्यमियें आस्सेया बनाए जाने आहले रेशें पर GST 18 प्रतिशत थमां घटाइयै 5 प्रतिशत करी दिता ऐ, कन्नै गै इस्सै चाली दे धागें पर टैक्स दी दर 12 थमां घटाइयै 5 प्रतिशत करी दिती गेई ऐ। घरेलू खडोना उद्योग गी बढ़ावा देने तांई खडौने ते खेडुं दे समेयान पर बी GST 12 फीसदी थमां घटाइयै 5 फीसद कीती गेई ऐ।